

PRIJEDLOG

Pravilnik o izmjenama i dopunama Pravilnika o obliku, sadržaju i načinu vođenja trgovačke knjige

Član 1.

U članu 9. Pravilnika o obliku, sadržaju i načinu vođenja trgovačke knjige („Službeni list Federacije BiH“, broj: 91/15) dodaju se novi stavovi 2. i 3. koji glase:

(2) Uz oznaku cijene robe izložene prodaji ili pripremljene za prodaju u prodajnom objektu mora se označiti broj i godina zaduženja, odnosno zapisnika o promjeni cijena u trgovačkoj knjizi, ili druga oznaka na osnovu koje se može istaknuta cijena povezati sa prijemnim listom, odnosno zapisnikom o promjeni cijena.

(3) Ako se na proizvodu nalazi bar code ili druga oznaka na osnovu koje se može istaknuta cijena povezati sa prijemnim listom ili rednim brojem zaduženja u trgovačkoj knjizi, trgovac nije dužan postupiti po odredbi stava 2. ovog člana.

Obrazloženje

Pravilnikom o obliku, sadržaju i načinu vođenja trgovačke knjige u FBiH („Službene novine Federacije BiH“, broj: 28/06), **koji je bio na snazi do 2015. godine**, članom 8. stavom 2. i 3. bila je propisana obaveza da se uz oznaku cijene robe označi redni broj iz trgovačke knjige, **ali uz izuzetak za trgovce kod kojih se na proizvodu nalazi bar code ili druga oznaka na osnovu koje se istaknuta cijena može povezati sa prijemnim listom, odnosno zapisnikom o promjeni cijena.**

Međutim, 2015. godine donesen je novi Pravilnik o obliku, sadržaju i načinu vođenja trgovačke knjige u FBiH („Službeni list Federacije BiH“, broj: 91/15). U navedenom pravilniku **brisani su stav 2. i 3. iz nama neobjašnjivih razloga. Na ovaj način se nameće obaveza poslodavcu da bez obzira na činjenicu da se na proizvodu nalazi bar code ili druga oznaka na osnovu koje se istaknuta cijena može povezati sa prijemnim listom, odnosno zapisnikom, ipak mora označiti redni broj iz trgovačke knjige uz oznaku cijene robe.**

Ovakvim rješenjem se znatno otežava poslovanje trgovcima na području Federacije BiH. Veliki broj trgovina ima prosječni dnevni ulaz oko 800 različitih artikala i obaveza označavanja rednog broja iz trgovačke knjige i godine zaduženja na svaki artikal oduzima mnogo vremena.

Time se usložnjava poslovanje i povećavaju troškovi poslovanja kod poslodavaca i ne doprinosi

se kontroli zakonitog poslovanja. Radi se o klasičnom parafiskalnom nametu, jer zakon propisuje obavezu koja je potpuno nepotrebna i kod poslodavca iziskuje dodatne troškove.

Cilj bar kodova je da omoguće lakše i jednostavnije poslovanje, smanje troškove i doprinesu većoj kontroli zakonitosti poslovanja. Ukoliko je pomoću njih moguće povezati proizvod sa prijemnim listom zašto onda raditi dupli posao i stavljati dodatne oznake, pogotovo što najveći broj proizvođača već označava bar kodom svoje proizvode.

Također, ovakvo rješenje nije poznato u propisima susjednih država.

U Republici Srpskoj ne postoji obaveza označavanja rednog broja iz trgovačke knjige i godine zaduženja, te se trgovci iz FBiH nalaze u neravnopravnom položaju u odnosu na trgovce iz Republike Srpske. Jedan od ciljeva reformske agende je harmonizacija entitetskih propisa, a usvajanjem našeg prijedloga ide se ka tom cilju.

Osvrnut ćemo se i na propise Republike Hrvatske u kojoj je **Pravilnikom o obliku i načinu vođenja popisa robe u trgovini na malo** skroz ukinuta obaveza trgovaca da uz cijenu robe izložene prodaji označavaju broj i godinu iz dokumenta o zaduženju, odnosno zapisnika o promjeni cijena koji se odnosi na istaknutu cijenu ili drugu oznaku po kojoj se istaknuta cijena može povezivati s dokumentom o zaduženju.

Obaveza označavanja broja iz trgovačke knjige i godine zaduženja ne postoji ni **prema Zakonu o unutrašnjoj trgovini i Pravilniku o obliku i načinu vođenja trgovačke knjige** u Crnoj Gori, niti u **Zakonu o trgovini i Pravilniku o evidenciji prometa** koji su na snazi u Republici Srbiji.

Predložena izmjena je u skladu sa Direktivama Europske komisije i sa načinom poslovanja trgovaca u zemljama Europske unije.

Na inicijativu velikog broja članica Udruženja poslodavaca iz oblasti trgovine koje se susreću sa ovim problemom, pokušali smo da amandmanski djelujemo na Prijedlog Zakona o izmjenama i dopunama Zakona o unutrašnjoj trgovini, na način da se u Zakonu propiše izuzetak da ukoliko se na proizvodu nalazi bar code ili druga oznaka na osnovu koje se može istaknuta cijena povezati sa prijemnim listom ili rednim brojem zaduženja u trgovačkoj knjizi, onda trgovac nije dužan da označi redni broj iz trgovačke knjige uz oznaku cijene robe.

Međutim, amandman nije prihvaćen i ugrađen u Zakon o izmjenama i dopunama Zakona o unutrašnjoj trgovini.

Shodno navedenom, Udruženje poslodavaca FBiH predlaže da se donese Pravilnik o izmjenama i dopunama Pravilnika o obliku, sadržaju i načinu vođenja trgovačke knjige u koji će se ponovo ugraditi stav 2. i 3., a sve s ciljem olakšavanja poslovanja i stvaranja pozitivnijeg poslovnog

okruženja u Federaciji BiH.